


93

3

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
OCT 10 1952



鍾伯敬詩集卷之四

五言律

懸軍

聞道邢司馬懸軍駐島夷
聖人寬外懼小國望王師
休戚關何事恩威在此時
爾邦全仗漢供億莫言疲

贈熊生

家破猶存舌身餘幾剝膚
解驂慚越石彈雀慎隋珠
鴻豈能囚熱鳥今且集枯
少年多畏路就宿好躊躇

春日課僮編籬訖成句



金仙荷言 卷四
事到山中減春偏 而後濃縛些成虎落澆竹汰龍鍾
新旭山山意遙烟岸岸容植援功不細減米餉諸傭

哭魏太易

降謫矜同籍孤虛怨共辰不然予哭子豈合爾殲身
後事煩知己高文揀替人志成焚告女商校夢中親
太易與余同生卒之年
余喪長男肆夏歲也

又

爾已先知我文能取稱情素交言懇痛才鬼鑒分明
世所悲奇數君翻就盛名
太易罷諸生後作六等墓
吟二十章人豔慕之

辭心已許鄭重敢寒盟

又

卓識驅先入新裁隘舊聞如君寧得老而我孰爲羣
心憊神辭去才多鬼欲分終當尊治命墓道署遺文

君自題墓曰明
遺文魏長公碑

三月三日雨中登雨花臺

去年當上巳記集冠家亭今昔分陰霽悲歡異醉醒
可憐三月草未了六朝青花作殘春雨春歸不肯停
烏龍潭吳太學林亭

金仙詩集 卷四
城午亭先晚園春水欲秋峰狂花約束鶯過柳遮畱
雲氣能香石湖陰半壓舟良辰多下鑰閒殺此林丘
五月三日秦淮卽事

踊貴絲兼肉爭先步與輪半簾虧蔽面一舫去來身
密葦驚翹袖飛花到葛巾含情相目處橋外閣中人

又

嵐減峰文細潮生水步鬆薄陰停障面新暑試輕容
烟閣晴皆綺山舩晚似縫火城波上下犀渚影重重

早夏集米仲詔園

閩肯當三月遊能共幾人盆山青欲暮池草碧猶春
入戶翻成野穿林似有津歸來逢我友半日慶閒人

西山三首

同馬仲良
湯去執

往往聞名勝遊踪到始知茲焉隨覽涉著處得幽奇
花鳥春難晚林泉夏每遲最憐絕出郭曲曲見淪漪

又

屢有看山約臨時半去畱大都隨意往翻得盡情遊
曲折無三里層深已數丘石苔非一致潭水各能幽

又

過橋微徑暝稍不辨峰文月散將殘雪烟迎欲墮雲
洞巖窺氣候水木悟聲聞喧寂皆何往空山方夜分

喜林茂之至燕

白門還故山無意入燕關以我到難必况君來更艱
偶然今夕話是否別時顏客計兼歸緒于焉且暫刪

又

相違曾幾月心口欲千端見爾遊能遠知今病稍闌
喜開朋舊劄兼悉毋兄安問答尋常事翻同意外看
集淨業寺水次再過十方菴看荷花因宿其中

韓求
仲招

如此匆匆際禪棲肯再來曾無三日隔又見數花開
童負桃笙至僧籠菜甲回出門拚一宿無復候人催

又

每憶經行處重遊勝昔遊往來能漸熟耳目自多幽
水氣窮昏且林聲閱夏秋晚花不無意客散獨相留

夜歸聯句

落月下山徑草堂人未歸林古砌虫泣涼露籬犬吠

殘輝惺霜靜戶逾皎烟生處更微古入秋知幾日隣

杵數聲稀惟

八月初二夜雨示金銘茂之

茲宵非月夕卽雨亦何妨但覺秋聲劇能令遊子傷
衣裳蟬背葉書信鴈頭霜共作長安客東西各故鄉

補七月二十七日生日詩

憶前初度日含意不能題入耳歡相勉驚心感自悽

閨人怨弧矢宦子倦輪蹄媿殺陶居士茲辰返故棲

元稹歸田詩有陶公三十七結
綬出都門句元時亦三十七

八月初六夜小集聯句

睡起理殘夢

張慎言

須臾故國身好秋難作客

惺新月

易辭人露咽蛩聲斷

韓上桂

天低鴈影親

惺

空將無奈

意砧急任西鄰

古度

白衣菴水閣

同茂之金銘

入燕欣見水況復是城中鴈帶他村日蘊生別苑風
暝兼沙草碧秋借渚花紅肯待空潭月移時已在東

微雨

定欲重陽雨方成此歲秋雖踈終助冷非久亦生愁
出戶纔能見經枝似不畱少焉如昨夜片月已墻頭

送韓孟郁孝廉還嶺南

送客歲將盡別情能勿窮題詩何所道對語不堪終
嶺樹冬難雪河橋晚易風同來君最久亦已返山中

送茂之南歸

不謂還家決題詩送子遲言歸雖累日賦別必臨期
明夜成今昨他鄉屢合離遙思初去後當似未來時

又

客程容易改遲日意何如無那親相待兼之歲事除
朋尊須夜半子舍及春初初名南中訊含情畏作書

庚戌除夕

除歲他鄉夕今年屈指三關心存與沒閱俗北兼南
燈火看相似杯盤對不堪自憐疎野骨此日候朝參

玉泉謁關祠

義勇歸何處凄然向此中始知真佛子卽是大英雄
丘壑延神理機鋒豁怨衷厭聞懷古者祠下說孤忠

夷陵道中

曾聞巴蜀道至此稍稱夷茲路險如此前途難可知
巖巒當雨閉水木到秋悲况值懷諸感州西扣策時

時哭雷何
思先生

巴東道中示弟恮二首

山中未必雨雲起已生愁峽窄天多暮江高地易秋
連朝皆陟嶽茲路獨臨流欲盡瞿唐勝歸途定覓舟

又

一帶高深處明朝次第行且從人指點未必客心驚
此去皆山水同遊況弟兄爲誰忘遠道所賴共幽情

暫霽

重陽無不雨況作蜀山行已歷諸峰險剛逢半日晴

峽寒偏著色江晚自多聲雖復終陰曠心魂亦暫清

月

蜀月清如此誠宜數見難尋常秋易沒十六夜初看
岸迫銜江淺山紆出峽殘今宵同宿處記取在雲安

次巴縣傅仲綸年丈招飲江樓賦贈

縱無樓可上此地已高寒夜爲今宵永秋憐數日殘
淹留隨處有簡易故人難漸喜成都近王城亦暫寬

十五夜月

峽夜何曾月巴東偶爾圓向來經驛路那似宿江天

霜落寒流外煙生遠映邊清宵亦何意獨值未歸前

哭雷何思先生十首 并序

鍾子以先生卒之第三日入蜀道夷陵欲為位
哭焉不能且不忍至自蜀始書千五百餘言以
告先生所可讀也言之長也乃復為五言韻語
十章使讀者易終聽者不倦付其家嗣仍語曰
鬼不必時至家必時時誦之或令侍子知書嘗
司筆硯者誦於所嘗遊息處以逢其至鍾子歸
亦且為位祀先生朝夕誦此招之記曰其神氣

則無不之也無不之也是以誦於家以奠先生
之一至焉

人言師與友吾直惜其人世事有今日我生何不辰
他時思柱石後進失陶甄豈意登堂約翻成築室身
又

于役亦王事迂途意為誰茲來覺無謂獨反欲安之
曠士友為命奇人世所司感恩知已外別自有吾私
又

斯人天遽奪似欲重羣疑弟敢稱師美人其謂我私

十年官幾日半面友同悲朝野思如此平生品可知

又

忽忽悠悠體倦倦亟亟心攢眉別有念抱膝豈徒吟
局外觀之審閒中得者深感知忘自量還欲效砭鍼

又

必有真豪傑斯無偽聖賢 二句櫟括先生語 茲言猶在耳自

待豈徒然瞻識曾相識機鋒果孰圓會當須見定密

坐義重宣 先生曾問子瞻識二字孰先子對曰瞻到

生瞻子曰初無先後但到處自能相生耳先生思之良久首肯

又

側聽平時語恒稱趙大洲及子窺述作似不異源流

各負匡時氣同懷出世謀惜哉殊秀實易地道相侔

又

乘化忽焉去遺書不一存分香非所屑易簣可無言

忍遽隔生死時猶共笑喧往還三月路半信始招魂

又

每於偶爾處言下察其微一往多寒色將無近殺機

真人皆氣骨道韻豈脂韋理數尋常語難參意外幾

又

惺也燕中病諄諄寄子聲有書言後事無字及私情
豈若盡忘語尤為真達生聞茲應問我來去孰分明

又

早知八月至猶得暫周旋子獨靳三日人皆忝百年
半生興盡矣一晤數存焉始悟長松下微言不偶然

庚戌六月先生坐報國松下與
二三子譚有為之教出世之旨

松滋泊風

舟經諸峽盡水宿四旬終葉落千村月松滋一夜風

寒江從此濶冬野自能空憶昨頻經險何如滯此中

懷譚友夏時在金陵昨夜夢寄伊書談使事及

詩兼徵其近作

寄書與對面已自不相同况以數行許託之殘夢中

新文知各異密意或能通別緒兼遊蹟諄諄語未終

吳彥先自金陵過訪兼致諸友人書感賦

索居敢厭客况有故人臨檐鵲非無識江魚果致音
清華衣履氣淳古鼎羹心各道經時事關情自淺深

新涼東彥先

金仙詩集 卷四
氣變中宵後秋驚二日餘新涼聊取適殘暑不遑除
雲淡河逾淺風輕木未疎問君視前夕旅況較何如

又

秋亦非無暑涼從此漸生天清何必夜林靜偶然聲
好雨能先月輕寒不礙晴共茲流火夕誰動授衣情

寄吳康虞

舊識南中半公還自古人意於林壑近詩取性情真
譚子多幽鑑稱君有遠神友朋山水理言下特津津
寄吳昌昱元振

兩代傳山水形神各自工從來真有識未肯苟爲同
惟不看家譜方稱有父風請觀君伯仲丘壑寫胸中
寒月同友夏叔靜作

清切山中月依稀水際看入霜惟覺澹過雨自然寒
夕淨來無累窓深到已殘添衣須一出此後對逾難
佛燈

寒照星星內能通靜者機幽明歸一點情理在餘輝
欲續何曾盡將殘似有依此中如悟得膏火已皆非

初陰

入冬晴夜夜薄晦却從今霜下暮寒半鴉翻山氣深
惜哉不能雪聊復暫為陰耳目一燈際殘更人外音

讀林茂之所藏陳白雲五言律七百首追贈

翁諱

昂字雲仲莆田人避亂楚蜀窮死金陵聞人誦其詩輒從傍哭

落落含毫際癸癸織履翁一生窮老裏五字險夷中
眇矣置心眼淵然具化工似聞君痛哭屢讀不能終
之燕畱別茂之時孟和偕予往茂之南歸

南北路皆寒之情非一端同來有聚散此別最悲歡
主反先賓去君今送我難叮寧弟與姪看爾發江干

又

別家兼別客之北且之南此後知何似斯時已不堪
往歸情正等辭送事相叅感爾分良友征途共夜談

新樂始雪

臘殘才有雪此事北來稀氣結原無漸寒添幸亦微
土沽行欲動塵嬾不能飛明歲重過處公途二麥肥

雪夜同孟和作

屈指王程盡驚心歲事終三冬無日別一雪此宵同
食息思南土衣裘試北風朝行能霽否片月晚寒中

金仁徵詩集 卷四
慶都早發望晴雪

親朋曾慮我栗烈薊門行豈意今朝雪先從昨夜晴
半林初日上幾樹白雲生曉看征衣色輕寒亦有情
雪後保定飲同年夏正甫司理

往往經河北奇寒早着人嚴冬行數次今歲似三春
雪罷能爲月宵中欲向晨因君風韻勝池閣亦清真
十七夜到京看月所寓因題其軒曰儗月

不見長安月那知近二年卜居惟問此對影已欣然
光在更深後圓當我到先清寒真可儗絕勝買隣錢

題孟和蘭石畫扇贈魏士爲年丈

片石何其介叢蘭但有幽自然能臭味不復異堅柔
並立原無附相憐不待求同心誰證取踈竹數枝秋
喜吳伯霖至兼逢馮宗之

伊我南來楚當君北到燕幾三年不老每一見相憐
理數俱無說文章合有權以何酬未足奇事定須傳

春日集韋氏郊園

同吳伯霖方孟旋張紹和李長蘅商孟和聞子將

城中諸所見到此已皆非時至花難後烟深柳肯稀
禽魚太無事水石自爲機遊興今方起殘春未可歸

又

閒時誠不易抑亦在其人地有何常主花非無故春
琴尊皆勝友山水況佳辰物候參差好重來想更新
別孟和從仲良之吳門

臨期寬一宿猶勝卽時行不覺已明日居然是遠程
稍能爲北計豈至又南征莫謂官貧好今朝媿友生
僦月軒後竹

僦月還兼竹深知所取饒月明無夜夜竹好得朝朝
以爾爲朋友何曾有寂囂誰能風雨後聲影共蕭蕭

寄友夏書

人海歎離索之情子信子欲聞別來事難盡卽時書
手已非心口言遑及起居封題送使後重憶不無踈

又

作客居家趣俱從朋友生知君遠遊念卽我欲歸情
玄嶽須相待金陵莫便行文章山水事去住不宜輕

代愛妾換馬

功名仗驥足志節略蛾眉不貴此時意難於無後思
疆場方有事閨閣亦何爲忍向時平日明珠買侍兒

入舟同姚君佐

昔來冰未泮今去露初殘
往反非前路舟車共此寒
圖書閑處得侶伴
眾中難一水秋冬色同君累月看

泊潞河九月二十四日逢立冬示君佐

水行亦云逸野泊乃生愁
北土寒無樹南人孤似舟
一身猶共子九月已非秋
安得移茲日前途佳處留

舟曉

久泊非無曉今朝如此天
鴉鳴半樹日虫亂一汀烟
物役踈星後孤情寒水邊
客舟離故處不遠亦欣然

舟晚

九月二十一夜

水天夜無色所有者蒼蒼
細火沾林露遙鐘過浦霜
離秋猶未遠向晚只微涼
此外還堪着清寒月一方

欲泊

所見平平岸舟移未覺非
汗萊何以別井竈大都稀
是物皆冬氣羣情似夕暉
今宵家尚遠有夢不遑歸

泊天津

流向南初豁舟將晚始多
魚鹽商異路涇渭水分波
同流異色孔道行裝雜
虛名應接苛北途車馬客未
清濁如畫

金仙詩集 卷四
信此洪河

天津早發

蠕蠕羣動起冉冉五更窮去岸何由記歸帆不約同
舟行星影下人夢水聲中計日從流上朝朝仗順風

舟雨

昨宵猶自霽今雨似非宜積晦來無候高雲動未知
渚花昏岸岸烟鳥白時時頗訝添衣驟舟寒水所爲

雨泊二首

水程元有准舟雨若爲增去市猶三里依村只一燈

屠沽崖戶少豆麥野人矜靜海容刀路經旬到未能

其二

旣雨兼之晚孤帆莫適從閉門烟際寺篝火水邊春
稻蠡舟人夜風濤客子冬暫將鄉思放動息亦從容

舟雪

稍厭終宵雨今辰雪反奇晚寒聊一變朝爽遂如斯
洲白沙相似烟青鳥不知十帆同此泊片笠去何之

舟月 十月初五夜

每旬無不見每見輒云新耳目何曾異形神但覺真

入舟如好友在水更宜人別我更初半孤燈又一身
靜海縣

此縣已名海我行將近齊兩旬三百里八口一舟棲
積水天同側晴冬野亦迷前途正歲暮霜雪莫淒淒
見月得起句因而成篇

寒月照歡怨清川流盛衰衆形各自取真宰亦何知
鍾應山摧後渠成水到時此中機殼幻未易使人思
晝泊

岸曲風難順沙寒日易昏樹無黃一葉雲有白孤村
酒脯遠趨市漁樵閒閉門晴天有如此雨雪不須論
風止

如此風猶定披衣驚所聞霜村晴一半烟水曉平分
天遠鴈無字波閒鷗不羣江湖陰霽事行止屬紛紜

滄州發夕

挂帆猶不息天水去安窮寒月歸鴉外生烟閉戶中
孤情前路惑羣力此時同可補經旬泊其功比快風

暖 十月十一日

今朝寒似止昨夜月先明風省千夫力舟兼兩日程

地晴生物色冬暖見人情但覺同聲處征帆一路輕
德州戲題

地曰平原頓行愁十日淹主人出有故驛路進能兼
庖廩隨前例魚蔬存小廉雖云聊復爾童僕不無沾

夜

十月十五夜舟已過德川泊柿林作

天寒無不深不獨夜沈沈難道潮非水何因風過林
戲拈生滅候靜聞寂喧音到眼沙邊月幽人忽會心

十月十六夜

離都三十日行路未千餘從此夜難永如今冬匪初

韓婆風幸免

是日風楚俗謂之韓婆風

楚客水能居已是還家候

斯時止得書

有所示

僅僅知文字時時自晦沈全身羣婢口事主五湖心
筆札師子便箕裘託爾深肅征安厥命且莫怨稠衾

深夜舟進

可以維舟處舟人不肯安今宵晴景好數日上流難
寸進賢於已羣心勇亦寬月明無睡理乘此盡情看

月暖

霜天非不晴晴亦自凄清茲夕維舟罷猶堪出戶行
水明如夜氣月暖是冬情似覺頻頻曉關雞凡屢鳴

將之青州由東昌登陸呈馮羽明年丈

既水復之陸多寒惟少暄山川此生事舟馬數年魂
清世王人簡窮途地主尊從君借風力六轡始周爰

經聊城魯連射書處

火牛難再出隅虎已垂窮危矣強弓末微哉一矢中
城亾終去殺將死亦成忠所以為排難非他策士同

金嶺驛與王帶如年丈夜談

久思今夜話斯意想同然屏騎子宜往携尊子肯先
見聞生一別師友異三年促膝驚心事苾苾秉燭前

沂水道中風

北野樹無枝風過處不知衣裳前日盡舟楫異途疑
八口冰霜外三冬水陸時宿遷雖有約未易遠如期

沂州王右軍故宅今為普照寺有洗硯池

其地無右

軍書

江左君家巷瑯琊復有廬不聞天下士定認此中居
舍宅翻畱蹟臨池未見書古人少年筆晚節自刪除

金仙詩集卷四
彭城入舟後候淺三首

自十一月初七日至二十三日

河水未生處烟帆仍泊身斷籬冬罽栗方響夜筵賓
計晚尤官吏情危聽鬼神巫言明日濟聊欲慰吾人

又

冰腹寒猶解河身下反高所爭惟尺水厥利在千艘
委壑金錢易篝燈畚鍤勞舟航今日慮未暇及風濤

又

瓠子偏難決桑田恐易成道傍朝暮議舟外喜憂情
有盡薪兼土無靈璧與牲運艘猶未過官舶莫先行

過淺

十一月二十三日

寂然舟共水中夜忽同聲里鼓不遑報岸燈無故生
半旬羣策屈一間萬夫爭前後終當濟先人自物情

舟泊雲龍山下

羣情仍一寂舟與水俱寧兩岸冬惟野千帆夜共星
鐘聲收廣莫人語警空冥喜就佳山泊重來放鶴亭

彭城開船

二十五日

泊久舟重發翻如始入舟後時偏過望前路不遑憂
鴈喜人南去鷗從我下流低回獨何繫未易別黃樓

金竹詩集
舟至呂梁洪

二十六日

半月徐州住今朝下此灘初暘波一分積氣野無端
人涉何其便魚遊似不難變遷川谷理天險亦安瀾

經下邳圯上受書處

有序

未託素交先呼孺子以僕役而加國士若子弟
之應父兄亦倨亦親非真非戲蓋語盡於投書
之後者淺意藏於受履之先者深行徑頓殊機
鋒相逗業已道存於目擊豈惟氣折而心開乃
云強忍相從初尚愕然欲歐夫乃以市中年少

之腹而窺圯上英雄之心乎淺哉太史之言未
免文人之見經途感事懷人賦詩用抒斯衷兼
訂昔惑云爾

警蹕秦皇帝溪橋老禿翁奮椎羣力外進履衆人中
智勇皆何往天人有所通英雄關運數授受不相同
射陽湖

情深流數日俱是射陽湖潮響亂如一漁燈遠不無
寒逾知水月天漸入菰蘆此去邗溝後東南舊日途

入江

十二月初九日

所歷皆河海今朝乃見江天淵同積氣風日變寒瀧
魚影真堪數鷗羣不易雙三山雖伯仲意總未相降

金焦北固

登金山同君佐

兩度遊皆略猶賢於未看見聞江四面行坐石更端
薄晚風煙亂深冬水府寒妙高臺上月共待亦非難

郭景純墓

在金山江中

奇人萬古宅不肯不陵嶒以此江中月爲君地下燈
山川因爪髮神鬼守緘滕危石憑何力飛流未敢崩

北固夜歸

遊遲畏晚天晚際反凄妍好月下山路順風歸浦船
雲濤孤棹外市場半燈邊回首蒼蒼處金焦在亂煙
至金陵過林茂之宅

蓄意在相見旣來無所爲風波登岬處雨雪到門時
地自一茅宇門多數柳枝細觀此情事昔別若先知

壬子茂之別予楚中有明歲重銜命江南儻路中之句

雪集茂之館

同胡彭舉吳康虞王相如黃九洛

白門三度雪皆以待幽人閉理閉門事堪遲見客身

澹然相語默別自有宵晨竹石殘冬裏清寒見遠神
過胡彭舉

五載未曾到庭中如昔閱所添惟一石何異在深山
懷值秋冬際人來冰雪間自然費幽意永夜不能還

立春日同商孟和弟居易集予丘茂之宅十二月十二日

十七日

良辰復佳晤皆值此寒天雪與冬終始春居雨後先
新詩茶酒內密意燭燈前共待梅花霽歸舟又隔年

除夕守歲子丘茂之宅時子丘與孟和居易至

自吳門

好住雖君宅終為客子身所欣來遠道各自有周親
盡室廡邊夕明年江上人秣陵才到曉便已歷冬春

元日集鷄鳴寺塔下亭

發春雖一日萬象不能局汨汨風煙動冥冥艸樹靈
餘寒一以素欲霽自然青百步城中地湖山積此亭

攝山道中甲寅正月二日同吳康虞商孟和林茂之

出郭心誠暇俄焉應接分湖山春格韻艸木畫情文
半壁深畱雪千林遠共雲齋鐘不知處隨意示聲聞

白鹿泉

半嶺尋源上寒泉閉戶中餘飛難作雨輕吹不關風
梅影過橋立苔文與石同早春流尚細澗脉未能通
疊浪巘尋繖山和尚不值遂登山頂

山僧下山去終亦不離山客到縣巘半身如亂水間
輕裾雲氣共孤杖澗聲還歸路君當在愁君閉竹關

天開巘

初不容思議中天忽削成寒松通石魄幽竹覆泉聲
蘿蘚多無緒冰霜別有情高深巘洞理潛玩長靈明

攝山頂

卽論茲山絕登茲者亦稀定須尋磴遍肯不見江歸
遠色何繇正羣形妙在微下看巘塔處來路似皆非

贈凡公

公年五十六
出家未三年

猶是新披剃頭顱已颯然悲歡興願日五十拜師年
地若曾來後機懸未到先遊棲關志氣相待不無緣
贈蒼麓老僧

逢君亦不遲已是再來期猿鶴曾無怪巾裾有所疑
人天中國老鬚髮外真師好記今年夕空山初月時

攝山歸過靈谷

歸途卽靈谷同日往非難客在梅前到春當雪後看
澗迴流水邃野淨夕陽寬物色晴爭起溪松不肯寒

舟發金陵畱別諸友

四年中北邙一月內長干再見如初至新知及故歡
無能頻几席未免爲衣冠又問春江楫垂楊不可看

須濡口阻茂之別二首

題詩似別我我且末之看莫道同行樂卽今相送殘
家無好山水友有夙交歡以爾閉門日往還殊不難

又

舉家聞欲去數日不能言知我獨還里無君難杜門
豈茲僅存骨尚有可銷魂暫省斯時別形神且勿煩

賦得不貪夜識金銀氣

少陵此語蓋聞道之言
讀者以爲不可解解則

失之而實有至理語固有不必解而至理存
者此類是也知此乃可與言詩予旣賦此以
通其意并示友夏
及弟叔靜同作焉

奇光深夜中志氣若爲通不覺川原秘森然星月同
居心無欲惡觸物自清空山鬼窺幽獨欽茲靜者衷

途中新月

馬上路殘處山中月出初方將行未至豈可照無餘
光作長宵始消惟新水如家居人不覺寒火半扉虛

紅葉

蕭蕭猶未落在樹幸能紅薄暮初霜進近山寒燒同
光輝翻寓殺幽艷屬成功秋色兼春事含情并此中

夜觀蒙惠二泉

水從天一生到地二泉并深夜積秋氣初寒流月明
幽靈如不隔聲影敢相輕燈燭散空迴中含風雨情

羣山萬壑赴荆門

茲爲楚蜀門喉舌古今存陵谷於焉始高低相向奔
衆靈難自住三峽爾何尊也學江流下滔滔歸一源

贈劉玄度孝廉爲雷太史同年好友

精神堪警俗耳目不知喧就此機鋒裏窺君靜慧根
敏皆從好學中豈厭多言益見交非泛吾師卓識存

磁州

長路惟愁此暑行殊不然濕光啞艸動涼信笥衣傳
蟲亂水烟上蛙喧風雨先北方農候晚物土幸無愆
選蔡敬夫詩訖寄示三律

金仙詩集卷四
君庸不自知必待我商之要以古人眼深看今日詩
直期於見道汗豈至阿私亦自關吾識安容苟爾爲
又

自處不能恕於君敢二焉卽今予所舍猶使世堪傳
甲乙何關俗春秋頗責賢細觀新舊作損益有繇然
又

去取了無忌惟君知我誠匪徒文字理要自友朋情
藏亦何妨出多當不易精畱茲嚴冷意事事與相成
丙辰初春寄張金銘

椒盤壬子歲寒燠四回新別後無除夕筵中少此人
雪霜頻犯暖梅柳不知春負爾非他事緇衣京洛塵
又

自君今不至予罷水邊行花月何顏色禽魚寡性情
乘閑猶有日選勝頗無名軟艸垂楊路重來恐漸生
十二月十九日雪是立春次日

臘去人思暖如茲亦快哉寒爲春事始雪作歲光來
累日無遺憾空齋行幾回不知花五六月內誰栽
又

又雪敢言寒今年有此難何知天意在要取物情安
野潤全非濕煙新只似殘若無沿路餓也好出門看
秋夜與茂之閑坐

同君閱搖落今又在燕山月與秋俱淺雲當晚亦閑
蟲鳴惡可已鶴警復何關已是聽觀外猶然庭戶間

贈陳荆生

吾子自稱詩人皆曰畫師此中深有寄其意莫能知
筆墨非徒爾親朋隨所之古來負絕技隱德類如斯

泊 九月一日

動止姑從衆安危未敢言居人歸有處旅泊近何門
寒日能紅樹淒風欲白村野稀舟幸接擊析共相存

風阻蔡村念吳康虞候於前路 九月四日

致子久於待因予先有期陰晴非在我川陸不相知
未覩舟同阻應嗔到獨遲若過重九後更是月明時

汨流河驛

葉減秋無幾流深月不難沙星踈欲活霜火濕爭殘
天水羣情定禽魚積氣安病身多閉戶慙負此光寒
九月十一日喜康虞入舟

雖有事前約堪同意外逢友朋相聚會舟楫最從容
途旣經齊甸遊當了岱宗生年來幾度如此一秋冬
自仙人橋觀於舍身岨

不獨高深理河山之所盤爾時諸嶺末如在二流端
日月來當早煙霜上亦難片光誰蓄泄元氣此中看

岱歸後示泰安州守侯君

岱宗固常在王者待其人覩爾神情異證予聞見真
歸堪言所獲傳不患無因一片古今意相煩致嶽神
十一月初二日雨

冬連秋只霽霜力不能寒一晦非無謂新霑反似殘
河聲胡損益雪事轉艱難且愛蒼蒼外煙林相與寬
十一月晦夜初雪過潘稚恭江閣

入江初見雪近臘乃知寒以我爲情久過君及夜闌
光才依水白力不待風殘值此夕之晦聊同片月看
正月初二日大雪同王永啓林茂之集雨花臺

是歲元
日立春

雪旣負花名非時諒不榮恰逢春次日用紀歲王正
期過偏能暢光深如欲晴誤驚梅放遍先往近郊行

靈谷寺看梅

正月二十八日同
王永啓林茂之

好春無一日花事有難言至此始成朶從前宜閉門
雪霜非在地香色欲爲村不盡關新霽精神寒亦存
看梅送何玉長入楚

今年梅後期君去及花時鄉信正煩寄行舟莫又遲
春風柔有待江水駛相宜計聽樓邊笛還當存幾枝

長生館詩

有引

佛家戒殺厥念惟悲儒者好生其原在樂然不
引之樂處於以預達其生機卽徒發乎悲心何

能逆折其殺趣長生館者湖惟玄武山則蔣陵
焦漪園先生倡衆置館於其中焉每於月之八
日與客遊棲聽僧禮誦漁獵何曾厲禁不過寄
意於湖山天淵共觸慈心業已移情於魚鳥聞
荷香而斷罟蔭樹影以投弓事不相蒙緣有交
湊惺幸與茲會喜而爲詩

湖山於此積魚鳥欲成圍是物皆生趣何人無善機
來惟言眺詠久乃共歸依頗悟因緣事其中導引微

十月十三日步月

同胡彭舉許無
念林子丘茂之

別自爲清夜非惟晴使然與秋同一靜未望欲先圓
積氣歸孤月深光作遠天此時無不息悶者反遲眠

十月二十日往花山雨宿途中

同吳康虞
林茂之

有約愧頻止猶賢竟不行冬方云久霽月許到深更
風雨臨時事江山一歲情從來遊者理貴勿預期程

又

屢失清和日因言雨亦佳良辰猶可待靜侶最難偕
有此秋冬感彌深遊止懷安知山澤候妙不在陰霾

寓白門寄朱叔熙比部

此地去君近爾令消息難始知思往日却悔別長安
輿步情辭接圖書職務寬天涯良友聚未免藉爲官

夜過胡彭舉

良夜卽相過况今將盡年冬晴非可必月好莫徒然
杖履人眠後琴尊客到先看君安性命一石嬾如前
范漫翁復自東郊移至城居故處

幾空誠爲累離羣亦寡歡寂喧無可出去住已更端
豈必謀皆是姑從意所安琴書能戀主不道屢遷難
又

總不離郊郭回環得故棲
階皆無改井樹未暇成蹊
盡每思良友齋嘗聽逸妻
存茲人外意動定理應齊
臘月二十三日伯倫招集木末亭

是時能共到可不謂閑人
候雪翻愁霽撰梅似貴春
煙高江欲動風遠樹初勻
遊事年周始亭臺識此身

除夕喜雪

雪期爭一夕要以臘爲功
幸不過春後非專報歲終
新茶泉脉至宿麥土膏通
無限天人事災祥在此中
元日雪過康虞彭舉茂之不值

誰不憐新雪能無各往看
以予到門早知爾在家難
天地何其近風煙但一寬
晤時矜所得肯道向來寒

雨後靈谷看梅花

同康虞漫翁于丘茂之
袁公寥在二月初八日

花時同所惜各有看花情
念我三年客於茲兩度行
孤心多在雨衆意但言晴
水雪成香國知從何樹生

又

日爲梅花至松陰先看山
此懷難以喻其事自相關
共在香光內分行澗壑間
却思人散後寒月守潺湲
二月二十四日雪後沈宗伯招集高座寺

同許伯倫

胡仲修

一雪送寒梅梅殘無可摧似將花五出移向樹重開
風物均調事江山眺詠才新晴春欲始日日好亭臺

夏梅

和董崇相

花葉不相見代爲終歲榮誰能將素質還以敵朱明
坐臥已無暑色香如尚清始知幽艷物不獨雪霜情

秋海棠

墻壁固吾分煙霜亦是恩光輕偏到蒂命薄幸餘根
笑泣誰能喻榮衰不敢論年年秋色下幽獨自相存

喜鄒彥吉先生至白門惺以八月十五夜要同

李本寧先生及諸詞人集俞園

并序

以此清秋於焉嘉客白露蒼葭新染芰荷衣上
歌童舞豎半攜書画船中愧時一相思惟小子
之戒行太晚雖禮無往教在先生之乘興何妨
以賓主而易師生懷斯盡矣由合離而成壯老
感亦因之睠焉興念勉爾爲歡里寡新聲入耳
就絳紗名部之音地無勝迹娛心發金谷故園
之想積數十年之緒以永今宵合幾千里之人

而同明月如茲三五豈作尋常履簪雜選高人
自領孤情絲肉喧闐靜者能通妙理各稱詩以
言志用體物而書時

講席兼陳樂年年此願慳自携供帳遠暫寄客亭閑
月靜星辰內秋深烟水間從公無小大皆不自言還

又

中秋時地有今夕三賓稀歌舞原非借林亭只似歸
浮涼池鳥醉空影砌蟲依頗悟歡場裏高人有靜機

又

夜與水相得秋惟月最親留都清絕地祭酒老成人
道廣周旋恕情深領察真典刑欽在坐游謔荷陶甄

送商孟和秋試後歸閩

數千里就試却向榜前歸率爾爲來去看君無是非
江花揖酒近堤柳泊舟稀不敢便言別回帆紅葉飛
杪秋宿牛首次日歷祖堂獻花巖

閑隨新霽出風日到牛頭松作山中夜月留泉上秋
心魂凡屢止人我幸同幽引客栖尋熟子今是後遊

又

山光領其一又復及他岑回見雲煙變彌增丘壑深
昨宵有明月必照此疎林一片融公石弘慈古佛心

早冬遊攝山

每來生節物又值早冬時澗石峰巒具岩花冰雪為
空林行有得靜夜坐方知一宿聽晴雨皆於遊事宜

又

地非難一往客未易同遊每以須良友因之失好秋
山寒晴不重林氣月彌幽慙負歸常早頻來當久留

臘月十五葛震父要集齊王孫山居

同郭聖僕
林子丘茂

之

頗怪知幽徑今年到已三竹寒猶可借梅早不須探
雪月時皆是冬春情未堪半窗人事後燈火照深談

春事

春事盡於雨遊期多在天聲香能幾日花柳已今年
塵務况居半勝情寧得全我生將五十所感有繇然

仲春程仲秩要汎赤石磯

同王永啓王太古
彦倫林子丘茂之

城中今可汎君愛出城閱春物泐澗外煙光動止間
逢花頻步屐返棹亦看山共計陰晴日各憐遊事艱

雨中柬茂之病

不出畏佳日却云風雨宜君雖私藥物衆亦負花時
臥只如高士愁偏及靜思留春應有待清霽故遲遲
問茂之病

君病年年事尋嘗漸不憂神明安可恃朋友代相謀
藥價貧偏貴花時好未酬因思南郭外不易是同遊

又代秦淮五日賦得投詩贈汨羅

是君臨命日不敢賦牢愁緩舞迎神保新聲託蹇修
淮流何澹澹湘水共悠悠似見來酬答風生杜若洲

在白門喜譚友夏至相見有詩感答其意

勿曰生同地相離卽異鄉六年人倏忽千里意尋嘗
述作交爲慰聲華不敢當清淮明月下暇豫荷恩光
出通濟門訪郭聖僕與友夏同往

不告君幽處到來心始遐未離城以外相導水之涯
僕妾道人侶敦彝貧士家清齋微識却坐久進茶瓜
過王永啓小閣同友夏時永啓病後

亦自登斯閣今朝懷共開鶯花當病起風日有朋來
如入城中舫兼臨江上臺佳情原未廢戶內可徘徊

和友夏拜客觸暑就茂之舍休焉忽伯敬亦至
之作

君能嘲熱客自出果何心難免逢迎事彌慙剝啄吟
望廬圖一憇解屨見同尋况得主人靜閱言生夕陰

月夜王太古要汎秦淮同友夏

盛饌頃高士幽懷就好天舟移山色內燈起浦歌先
月冷因三夏河深在衆煙各無言路晚賓主一橋邊

送五弟快還楚迎家尊赴吳中教職

數往慙吾弟微官累老親公私言浩蕩俯仰事酸辛

壯齒輕諸役全家就一貧孤舟兼孝友勉矣服勞人

歸舟月上

欲雨偏生月熊熊日出初秋移三夏裏涼借一光餘
待爾歸嘗晚驚人見似踈捨舟情事始竟夕有盈虛

送王永啓歸省兼云董崇相

已俱忘是客先別我還聞直倘能存道貧今可見親
非無逢世術難作負心人有友知君孝全歸不失身

沈雨若自嘗熟過訪九月七日要集敝止有虞

山看紅葉之約

時喜得錢
受之書

見君疑舊識不必故人書所念久離別欣聞近起居
朋來鴻鴈後雨止菊花初得問虞山樹寒紅三月如
至毘陵訪鄒臣虎年丈

此行雖定省過訪約先時門徑欽孤性圖書寄獨知
親能安善養友不至阿私抗疏言方中彌深感事悲
贈鄒太公臣虎尊人

以子識其父於翁殊不然在家羞教調去國幸歸全
一命心忘却三牲世有焉未知忠孝事論定果誰賢
譚友夏自越歸晤別於錫山

衣邊秋未去霜氣自湖陰凡子吟能及皆予夢所尋
分風來往路計日聚離心各指梁溪水寒煙共一深
訪王德操居士曾晤於鄒彥吉先生莊居

以爾知音者猶存人外踪溪聲當薄暮門徑似深冬
雙檜自今識孤舟非乍逢讓鄉前夜語有約許相從
汎吳興碧浪湖夾山艸蕩漾

賦

韓求仲具舟同林茂之夏長卿諸子

衆妙從流去層巒著處生入天湖有漸浮地漾何輕
蘆渚如秋夜桑村在晚晴一舟空曲後寒火落分明

又

湖山深更深導引主人心以爾能無倦同予得再尋
煙寬鷗失侶天靜鴈留音往返虛靈內形神有所欽

又

林巒同作水風日不離煙清照難留物寒遊頗用天
飛潛終日竟心目一隅全返棹憐閑石冰霜影默然

舟泊吳江步尋周安期安仁

停舟非夙約信步即君家沿岸携初月登庭及暮鴉
燭燈如有待蔬茗自無加也說明朝去晨星在戶斜

婁東訪尹惺麓先生

進退稱維谷人皆恠一官機緣無此妙遊訪得相寬
建業天初霽婁江月未寒三冬來往路風日最為難

又

即論金陵別于今歲又除苦無多聚散銷得幾居諸
約在歸衙後來當退食初一燈師友語壯老十年餘

又

無友無家者因官寄白門時情多可慮客意自難言
文武公為憲安危國有藩放情圖史外樂事拜餘恩

弇園憶贈王元美先生四首

道廣無邊幅為園亦復然一鄉千里近萬卷百城專
稍冷簪裾地彌高木石年徘徊尋履迹緩步惜寒煙

又

天生人與地用貴稱其宜文獻非俱乏刪脩或可為
有詩滋異議無史答明時賴此千秋後猶存未竟思

又

文章姑無論交道達神明至性能風世餘因不愧名
死生千里路七十兩番行竹徑留遺迹堪思命駕情

吳明卿兩
過此園

又

承響誠無怪皈心亦有因吾聞公長者眾謂世文人
大度推揚急虛懷吐握真茲園如散處四海少孤貧

贈徐元晦

雖復未相見十年知有君端居偏致客任俠况能文
難與今人道嘗聞我友云昨逢賢訪使首問爾殷殷

又題畫蘭

日日弄香色靈明瓜指生近來添竹石益以助幽貞

熟後翻新譜閨中換妙情讀書諸務輟筆墨亦輸卿
贈程彥之

歲歲君如此相憐何日休置身時地少失職友朋羞
窮豈皆詩罪饑仍爲醉謀贈錢聊儉用前路不堪遊

過文文起孝廉葑圃賦贈

君與啓美爲徵
仲先生曾孫

賢者後如此何如親炙情況非資祖德自不愧時名
一語足文獻二園難弟兄扁舟吳越路似復爲君生
虎丘贈別徐元歎

出城不言送猶只作闕行寒月虎丘路孤燈明夜情

真文關世運幽賞略時名吾子尚良食前途勿自輕

毘陵雪夜別茂之還金陵

出在三秋末歸當再雪餘一寒分去住明日念舟車
此別時無幾相逢歲又初中途情事異聯步有離居

毘陵家慶畢還白門道中作

正月五日

秣陵雖久住吾土是邪非新歲此初出征途亦曰歸
有親仍告別畱弟與相依節物家家鼓郊原人事稀

瓶中梅影映壁上畫梅影

和葛震甫作

一花分合處形與影邪神雪月來誰識香光借亦親

暫依俱幻相別立是真身此際難為喻羅浮夢裏人
上已過牛首山莊看雲池王翁桃花翁先約往
四年中凡三至此矣

今日是修禊山中尋爾家何嘗不臨水况又得看花
積雨晴朝貴新煙春事加次日笑他武陵棹再往失
津涯

元景隔日約遊人翁時年八十有八歲作桃花至天
身紅多成世界香久結精神好待山生月同

時炤暮春

月夜過胡彭舉

一春多雨夜見月好懷生未及先相約遙知亦此情
素心朝夕近僻徑往來清恰值君無事開扉如出迎
月下新桐喜徐元歎至四月十五夜

是物多妨月桐陰殊不然長如晨露引不隔晚涼天
綠滿清虛內光生幽獨邊懷新君亦爾到在夕陽先
白門病中送親還毘陵

客子病猶爾老親還豈安祇堪添一別却似未來看

有手不能執於心難更酸我生非小可天命足相寬
又

去住不由已難將骨肉牽一官天性隔萬慮旅書連
遇難思先德防身悟宿愆何時筋力健歸養學耕田
病間贈錢振河

雖復情相係呼君君豈知無心身到日有幸我生時
榮衛因人付恒竒不自為敢云輕性命小愈忽良規

感歸詩十首

微官今日至萬病一朝來罪福誰司計乘除已致災

性情良自審命相久相猜不死多時地行藏聽所裁

又

弱骨當縣疾安危不自知客中憂老父意外賜名醫
得步庭階日堪成止足時如茲猶過望幽譴或相隨

又

居官頻道去此語未為新事小皆由我情真豈告人
暗中營退步久後信閉身猶以貧而仕無辭對老親

又

五載白門客歸心漸不生江山皆識面童婢亦知名

住久怨難免交深怨或輕故鄉雖朴略事少稱孤情

又

才入儀曹署於中處處違因之生一悟過此可成歸
羅雀心方息然魚累始稀世人添感慨翻似悔忘機

又

踈僻居鄉井招尤亦有時不因官自護終免世相持
催謫豈無已親朋皆我知遠交多復久恩怨暗中移

又

曾作中年想圖為偏地遊豈徒新識樂欲寡久居尤

此自快心語而非着脚謀頻來惟一弟破浪亦堪憂

五弟又
來看

又

窮覓歸依路愁予但口談

徐元歎書
來云云

得生輕寵辱用

死勝嗔貪悟晚終無退心堅在一慙鈍根磨正厚愛

我者相叅

又

謬云名與實官不益微躬三月一眠後諸緣皆夢中
除醫無切用學道有宗風捨宅聞吾友歸慙尚築宮

元歎
近事

又

文人而學佛愚哲或相兼自有孤軍入非將結習露
寒暄須飲水夷險在臨巘何夜寒河月金針面語拈

譚友夏作書謂予以
聰明妨禪語多影響

春日過沈雨若問病并訪唐宜之

人事亦云遠春光非不知孤懷如有告一病豈能為
梅又待明歲柳方垂此時柔條莫遽長吾意愛絲絲

又

病非難習靜何以着身心幸有友相警况為予所欽
讀書頓花鳥閉戶當登臨已愧見時少幽居莫更深

夏日遊攝山同王惟士徐元歎胡元振

徂夏成茲往入春同此心鶯花相待滿林壑至今深
宿處逢山雨歸時記澗音連朝陰霽裏有意便栖尋
題畫送沈朗癯入廬山兼寄愍公

猶未除鬚髮先能斷肉妻晨星驚老宿秋色引遐棲
濕過層層樹橋藏曲曲溪杳然雲樹裏奔悅漫成迷

又

泉石冥遊跡幽明默護身出家超將相度世答君親
水觀神三界山行影一人遠公迎汝處寒月石門新

